

Na osnovu čla. 12. i 18. Zakona o udruženjima i fondacijama ("Službene novine Federacije BiH" br.45/02) Skupština Udruženja fudbalskih sudija i instruktora Kantona Sarajevo na sjednici održanoj dana 10.08.2017. godine donijela je

STATUT

Udruženja fudbalskih sudija i instruktora Kantona Sarajevo

I - OSNOVNE ODREDBE

Član 1.

Udruženje fudbalskih sudija i instruktora Kantona Sarajevo (u daljem tekstu: Udruženje) čine sudije i instruktori suđenja sa mjestom prebivališta na području Kantona Sarajevo, koji su dobrovoljno učlanjeni u Udruženje.

Član 2.

Ovaj Statut definiše i sadrži:

- naziv i sjedište udruženja;
- ciljeve i djelatnost udruženja;
- zastupanje i predstavljanje udruženja;
- organe udruženja, njihove ovlasti, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju lica ovlaštenog da sazove skupštinu;
- oblik i sadržaj pečata udruženja;
- oblik i sadržaj znaka udruženja;
- sticanje i raspolaganje imovinom;
- način donošenja finasijskog izvještaja i izvještaja o radu;
- postupak za donošenje statuta, izmjena i dopuna statuta i drugih općih akata udruženja;
- uvjeti i način učlanjenja, prestanak članstva, kao i prava, dužnosti i odgovornosti članova udruženja;
- uvjeti i postupak za pripajanje, razdvajanje, transformaciju ili prestanak rada udruženja;
- pravila za raspodjelu preostale imovine u slučaju prestanka rada udruženja;
- javnost rada udruženja;
- prelazne i završne odredbe.

Član 3.

Udruženje je shodno čl . 9. i 11. Statuta Fudbalskog saveza Kantona Sarajevo (u daljem tekstu: FSKS), član FSKS u kojem ga predstavlja predsjednik Upravnog odbora Udruženja fudbalskih sudija i instruktora Kantona Sarajevo.

Član 4.

Naziv Udruženja je: "Udruženje fudbalskih sudija i instruktora Kantona Sarajevo".

Skraćeni naziv Udruženja je UFSIKS .

Sjedište Udruženja nalazi se u Sarajevu, sa adresom Hamdije Kreševljakovića 7A.

Područje djelovanja Udruženja je Kanton Sarajevo.

Član 5.

Udruženje fudbalskih sudija i instruktora Kantona Sarajevo ima svojstvo pravnog lica sa pravima, obavezama i odgovornostima na osnovu Ustava i Zakona. Udruženje ima svoj transakcijski račun i pečat.

Član 6.

Pečat Udruženja je okruglog oblika, prečnika 2,9 cm, sa natpisom na vanjskim ivicama kruga i sljedećeg sadržaja: „Udruženje fudbalskih sudija i instruktora“, a u sredini pečata je upisan naziv Kantona Sarajevo, a tekst je napisan latinicom.

Štambilj Udruženja je pravougaonog oblika sa nazivom Udruženja, brojem protokola i datumom. Znak Udruženja je istovjetan znaku „Fudbalskog Saveza Kantona Sarajevo“ sa natpisom „Udruženje fudbalskih sudija i instruktora Kantona Sarajevo“.

II - CILJEVI , ZADACI I DJELATNOST UDRUŽENJA

Član 7.

Osnovno načelo djelovanja Udruženja je dogovaranje i sporazumijevanje, zasnovano na principima međusobnog uvažavanja, samostalnosti u opredjeljenju u vezi sa donošenjem pojedinih odluka, te sa pravom na izdvojeno mišljenje i potpunu slobodu izražavanja istog.

Član 8.

Rad Udruženja zasniva se na amaterskim i stručnim aktivnostima, a predstavlja struku potrebnu za opsluživanje fudbalske/nogometne organizacije. Osnovni cilj Udruženja je razvoj i unapređenje suđenja te fudbala/nogometa u cjelini.

Član 9.

Udruženje svojim djelovanjem, suđenjem i edukacijom udruženih članova, želi da unaprijedi nogomet/fudbal u cjelini. Udruženje kontinuirano širi i razvija prijateljske odnose sa kantonalnim/županijskim i područnim udruženjima sudija, tijesno saraduje sa FSKS i preko svog matičnog saveza sa Nogometnim savezom Federacije Bosne i Hercegovine i Nogometnim/Fudbalskim savezom Bosne i Hercegovine.

Organi Udruženja imaju za cilj da:

- kontrolišu poštivanje primjene pravila fudbalske igre,
- sprječava nepravilnosti u djelatnostima kojim se bavi,
- sprječava vjersku, rasnu i političku diskriminaciju;
- štiti interese članova Udruženja;
- omogućava svim članovima Udruženja jednak tretman u suđenju;
- omogućava svim članovima Udruženja da biraju i da budu birani u organe Udruženja;
- vodi računa i to mu je cilj da se angažman članova u funkcijama svodi samo na jednu.

III – ČLANOVI UDRUŽENJA

Član 10.

Udruženje sačinjavaju sve fudbalske/nogometne sudije i instruktori suđenja sa područja Kantona Sarajevo, koji se nalaze na listama sudija i posmatrača suđenja na raznim stepenima takmičenja, te neraspoređeni instruktori, a svi su dobrovoljno učlanjeni u Udruženje. Članovi Udruženja imaju amaterski status, a po odluci Skupštine Udruženja mogu se udruživati u ostale asocijacije ako imaju svoj strukovni interes. Članstvo u Udruženju je dobrovoljno. Počasni članovi se imenuju prema odluci Skupštine, a na prijedlog Upravnog odbora.

Član 11.

Prava i dužnosti članova Udruženja su da:

- biraju i budu izabrani u organe i tijela Udruženja;
- raspravljaju na sastancima o radu Udruženja i daju prijedloge za rješavanje određenih pitanja;
- iznose mišljenja i stavove o radu Udruženja;
- učestvuju u donošenju odluka Udruženja, njegovih organa i tijela;
- budu obaviješteni o radu organa i tijela Udruženja;
- izvršavaju usvojene odluke i zaključke organa Udruženja;
- izvršavaju dogovorene zadatke prema Udruženju;
- pridržavaju se Statuta i drugih akata Udruženja;
- poštuju kodeks ponašanja sudija i instruktora;
- čuvaju lik sudije i instruktora kroz uzoran lični život;
- koriste beneficije koje proističu iz članstva u Udruženju;
- redovno plaćaju članarinu koju utvrdi Upravni odbor Udruženja.

Član 12.

Prestanak članstva u Udruženju može biti: smrću, svojevolumnim istupanjem na osnovu potpisane izjave ili isključenjem iz Udruženja. Iz članstva će biti isključen član Udruženja:

- na osnovu pravosnažne sudske presude kojom je osuđen na bezuslovnu kaznu zatvora dužu od 3 /tri/ mjeseca,
- u slučaju izricanja sankcije isključenja iz nogometne organizacije ili donošenja pravosnažne odluke disciplinskog organa NS/FS BiH za period preko 6 mjeseci za djela koja su suprotna Etičkom kodeksu NS/FS BiH,
- ako ne ispunjava svoje dužnosti iz člana 11. ovog Statuta

Odluku o isključenju donosi Upravni odbor. Protiv odluke Upravnog odbora o isključenju odnosno o odbijanju zahtjeva za prijem u članstvo, član može u roku od 15 /petnaest/ dana, podnijeti prigovor Skupštini Udruženja, koja će na slijedećoj redovnoj sjednici donijeti odluku. Odluka Skupštine Udruženja je konačna.

IV - ORGANI UDRUŽENJA

Član 13.

Organi Udruženja su:

- Skupština;
- Upravni odbor;
- Nadzorni odbor;
- Stalne komisije i
- Sekretar Udruženja

Član 14.

Članovi organa biraju se na 4 (četiri) godine uz mogućnost ponovnog izbora ako povjerene funkcije obavljaju stručno, kvalitetno i moralno, te budu izabrani na Statutom propisan način. Član organa Udruženja koji je izabran može biti i opozvan i prije isteka mandata od strane Udruženja, ukoliko je njegov rad opstruktivan i nije u interesu Udruženja, a isto tako izabrani član u organima Udruženja može i sam podnijeti ostavku. Opozivom ili prihvatanjem ostavke, članu prestaje članstvo u organima Udruženja.

V - SKUPŠTINA UDRUŽENJA

Član 15.

Skupština je najviši organ upravljanja i odlučivanja u Udruženju, koju sačinjava 17 (sedamnaest) delegata, nogometnih/fudbalskih sudija (saveznih, entitetskih, kantonalnih i ostalih), te instruktora izabranih iz svih struktura udruženih članova Udruženja. Svi delegati imaju pravo glasa.

Član 16.

Skupština može biti redovna i vanredna. Redovna Skupština zasjeda jednom godišnje, najčešće u prvoj polovini kalendarske godine. Redovna izborna Skupština zasjeda svake četiri godine. Izbori se vrše tajnim glasanjem. Redovnu Skupštinu saziva predsjednik Skupštine na prijedlog Upravnog odbora ili na inicijativu polovine članstva Udruženja. Predsjednik Skupštine u saradnji sa Upravnim odborom utvrđuje dnevni red sjednice. Poziv za održavanje Skupštine sa prijedlogom dnevnog reda sekretar Udruženja upućuje članovima Skupštine najkasnije 30 (trideset) dana prije termina određenog za održavanja sjednice. Shodno tome, materijale je neophodno dostaviti 15 /petnaest/ dana prije održavanja sjednice Skupštine. Sjednica Skupštine se obavezno održava jednom godišnje, a na istoj se vrši analiza rada Upravnog odbora i svih njegovih organa/komisija, te se po potrebi vrši zamjena članova koji ne rade kvalitetno svoj posao.

Skupština se može održati i na istoj donositi odluke ukoliko na skupštini prisustvuje najmanje dvije trećine delegata skupštine Udruženja.

Skupština donosi odluku 2/3 većinom glasova prisutnih delegata skupštine.

Član 17.

Vanrednu sjednicu Skupštine saziva predsjednik Skupštine na pismeni zahtjev polovine članstva Udruženja ili na pismeni zahtjev 2/3 (dvije trećine) članova Skupštine ukoliko se ukaže potreba za tim. Zahtjev mora sadržavati teme za dnevni red sjednice Skupštine i kratko obrazloženje zahtjeva. Vanredna sjednica Skupštine se saziva u roku od 15 (petnaest) dana. Prije sazivanja vanredne sjednice, predlagač je obavezan da uz poziv za vanrednu sjednicu dostavi i dnevni red sa pisanim materijalom.

Član 18.

Skupština ima slijedeća prava i odgovornosti kako slijedi:

- usvaja Statut Udruženja i Poslovnik o radu Skupštine;
- daje saglasnost na pravne radnje poduzete u postupku osnivanja Udruženja;
- usvaja izvještaje o radu Upravnog odbora, Nadzornog odbora i drugih tijela Udruženja;
- imenuje i razrješava dužnosti predsjednika i potpredsjednika Upravnog odbora Udruženja;
- imenuje i razrješava dužnosti članove Upravnog odbora Udruženja, Nadzornog odbora Udruženja i lica za zastupanje i predstavljanje Udruženja;
- postavlja odnosno imenuje i razrješava dužnosti sekretara Udruženja;
- odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama Udruženja;
- vrši sve druge poslove i zadatke od interesa za Udruženje;
- odlučuje o prigovorima protiv odluka Upravnog odbora;
- odlučuje o svim pitanjima koja nisu u nadležnosti nekog drugog organa.

Član 19.

Finansijski izvještaj i izvještaj o radu usvaja Skupština na prijedlog Upravnog odbora po završetku svake kalendarske godine.

Član 20.

Donošenje Statuta, izmjena i dopuna Statuta i drugih općih akata vrše se na osnovu prijedloga Upravnog odbora. Inicijativu za donošenje, izmjenu i dopunu prednje navedenih akata, može pokrenuti ½ (jedna polovina) članova Udruženja uz pismeni zahtjev. Sve odluke se donose na sjednici Skupštine Udruženja na kojoj mora biti prisutno najmanje 2/3 (dvije trećine) delegata. Da bi donošenje odluka bilo punovažno za iste mora glasati 2/3 (dvije trećine) od ukupnog broja delegata Skupštine. Ostale opće akte iz nadležnosti Upravnog odbora donosi Upravni odbor na svojoj sjednici.

Član 21.

Odluku o udruživanju u saveze, pripajanju, razdvajanju kao i transformaciji Udruženja donosi Skupština na prijedlog Upravnog odbora. Inicijativu može pokrenuti ½ (jedna polovina) članova Udruženja uz pismeni zahtjev. Odluke se donose na Skupštini na kojoj mora biti prisutno najmanje 2/3 (dvije trećine) delegata. Da bi donošenje odluka bilo punovažno, za iste mora glasati 2/3 (dvije trećine) od ukupnog broja prisutnih delegata Skupštine.

Član 22.

Redovnom ili vanrednom sjednicom Skupštine rukovodi predsjednik Skupštine. U slučaju odsutnosti predsjednika Skupštine sjednicom predsjedava potpredsjednik iste, a ukoliko su oni spriječeni da prisustvuju sjednici Skupštine Udruženja, istom predsjedava predsjednik Upravnog odbora Udruženja.

V - UPRAVNI ODBOR UDRUŽENJA

Član 23.

Upravni odbor je izvršni organ Udruženja koji obavlja sve izvršne funkcije. Rad Upravnog odbora je javan, a obavještenje o radu vrši se putem web stranice Udruženja.

Član 24.

Upravni odbor broji 7 (sedam) članova, a sastoji se od predsjednika, potpredsjednika i 5 (pet) članova. Predsjednika, potpredsjednika i članove Upravnog odbora predlažu članovi Udruženja, a isti se biraju na Skupštini tajnim glasanjem. Prilikom izbora za članove Upravnog odbora treba birati one članove koji imaju društveni kredibilitet, čvrst karakter i posjeduju visoke moralne norme. Uz prednje navedeno, članovi koji ispunjavaju sve svoje obaveze prema Udruženju i koji se u svom djelovanju striktno pridržavaju Kodeksa o ponašanju i isti se biraju iz reda instruktora I kategorije.

Član 25.

Upravni odbor ima slijedeća prava i dužnosti da:

- priprema sjednice Skupštine;
- priprema i predlaže nacrt izmjena Statuta kao i drugih akata Udruženja koje donosi Skupština;
- donosi Poslovnik o radu Upravnog odbora i njegovih organa;
- donosi akta iz nadležnosti Upravnog odbora;
- predlaže programe razvoja i unapređenja sudijskog kadra;
- usvaja program rada i izvještaje o radu organa Upravnog odbora;
- podnosi finansijski plan i godišnji obračun prihoda i rashoda Udruženja;
- donosi odluke o finansijskim isplatama na teret Udruženja;
- utvrđuje liste sudija i posmatrača na ligama koje su u nadležnosti FSKS;
- provodi zaključke i odluke koje je donijela Skupština Udruženja;
- vrši zamjenu i popunu članova Upravnog odbora novim članovima iz razloga neaktivnosti određenog člana ili zbog nastupanja više sile (bolest, smrtni slučaj i sl.), a koji će dužnost člana Upravnog odbora privremeno obavljati do prve naredne sjednice Skupštine Udruženja;
- verificira sastav stalnih komisija;
- odlučuje u prvostepenom postupku;
- odlučuje o raspodjeli prikupljenih sredstava;
- upravlja imovinom Udruženja.

Član 26.

Za rad Upravnog odbora, kao i donošenje odluka potrebno je prisustvo i glasanje natpolovične većine od ukupnog broja članova Upravnog odbora, od kojih jedan mora biti predsjednik ili potpredsjednik UO.

VI - PREDSEDNIK UPRAVNOG ODBORA UDRUŽENJA

Član 27.

Predsjednik Upravnog odbora je istovremeno i Predsjednik Udruženja. Predsjednik Udruženja predstavlja Udruženje i prema funkciji je automatski član Izvršnog odbora FSKS.

Predsjednik Udruženja u okviru svojih prava i odgovornosti:

- predstavlja i zastupa Udruženje;
- daje pismeno ovlaštenje članu Udruženja da predstavlja odnosno zastupa Udruženje u njegovoj spriječenosti;
- saziva i predsjedava sjednicom Upravnog odbora;
- predlaže dnevni red sjednice Upravnog odbora;
- stara se o izvršenju odluka i zaključaka Skupštine i Upravnog odbora;
- koordinira i usklađuje rad organa Udruženja;
- ostvaruje saradnju sa drugim asocijacijama;
- potpisuje akta koja donosi Upravni odbor i vrši sve druge poslove koji su mu povjereni.

U slučaju spriječenosti i odsutnosti predsjednika, zamjenjuje ga potpredsjednik ili član UO kojeg u pismenoj formi ovlasti predsjednik UO.

VII - STALNE KOMISIJE

Član 28.

U okviru svojih nadležnosti, Upravni odbor može da obrazuje svoje stalne komisije i pravna tijela, sve u cilju što efikasnijeg rada Udruženja.

Stalne komisije su:

1. Komisija za sudije i sudijska pitanja;
2. Finansijsko materijalna komisija;
3. Komisija za delegiranje i
4. Komisija za talent i mentor program.

U okviru ove grupe Upravni odbor će izvršiti izbor i verifikaciju istih.

Član 29.

Stalne komisije Upravnog odbora čine najviše do 5 (pet) članova, kao i Komisija za sudije i sudijska pitanja koja broji 5 (pet) članova, a koju na prijedlog Upravnog odbora verifikuje FSKS.

Mandat svih komisija traje 4 (četiri) godine sa mogućnošću ponovnog izbora, a njihova prava i obaveze regulisane su Pravilnikom o radu stalnih komisija Udruženja.

Član 30.

Za rad komisija i donošenje punovažnih odluka potrebno je prisustvo i glasanje natpolovične većine ukupnog broja članova komisije, od kojih jedan mora biti predsjednik komisije.

VIII - NADZORNI ODBOR

Član 31.

Nadzorni odbor sačinjavaju 3(tri) člana Udruženja koji nisu iz reda članova delegata Skupštine, niti su članovi drugih organa Udruženja. Mandat članova Nadzornog odbora traje 4 (četiri) godine. Prijedlozi za članove Nadzornog odbora trebaju biti dostavljeni Skupštini Udruženja, a dostavljaju ih članovi Udruženja fudbalskih sudija i instruktora Kantona Sarajevo.

Član 32.

Nadzorni odbor:

- nadgleda rad organa Udruženja, materijalno finansijsko poslovanje Udruženja, te o svemu prednje navedenom podnosi pismeni izvještaj Skupštini,
- predlaže mjere za uklanjanje eventualno uočenih nedostataka u radu Udruženja,
- poduzima druge potrebne mjere iz svoga djelokruga.

IX – SEKRETAR UDRUŽENJA

Član 33.

Udruženje ima sekretara koji se bira na 4 (četiri) godine, uz mogućnost novog izbora, sve u zavisnosti od ocjene njegovog rada u prethodnom vremenskom periodu. Ukoliko se ne bi mogao izvršiti izbor novog sekretara, Upravni odbor može imenovati vršioca dužnosti na period najduže od 6 (šest) mjeseci.

Sekretara Udruženja biraju članovi Skupštine javnim glasanjem, a na prijedlog Upravnog odbora.

Sjednicama Skupštine i Upravnog odbora prisustvuje sekretar Udruženja, ali bez prava glasanja.

Član 34.

Sekretar ima prava i obaveze koje su sadržane u sljedećem:

- izvršava odluke i zaključke Skupštine i Upravnog odbora Udruženja, te koordinira rad svih organa Udruženja;
- priprema i izvršava sve poslove i neposredne zadatke vezane za rad Skupštine i Upravnog odbora Udruženja,
- ostvaruje saradnju sa organima fudbalske organizacije: FSKS, NSF BiH i NS/FS BiH,
- prema pismenom ovlaštenju Predsjednika može zastupati Udruženje,
- sačinjava i vodi zapisnike sjednica Skupštine, Upravnog odbora, te informiše članstvo o aktivnostima i bitnim događajima za rad Udruženja, putem web stranice,
- koordinira i vrši permanentni nadzor nad radom sekretara stalnih komisija Udruženja,
- vrši i sve druge poslove i zadatke od interesa za rad Udruženja.

X - FINANSIRANJE UDRUŽENJA

Član 35.

Udruženje se finansira:

- od članarina članova Udruženja;
- od donatorstva i poklona Udruženju;
- od dijela prihoda koji pripadaju Udruženju kao udruženom članu NS/FS BiH, a prema raspodjeli dohodaka na kraju kalendarske godine, što je regulisano odlukom NS/FS BiH;
- iz drugih prihoda stečenih u skladu sa Zakonom i Statutom.

Član 36.

Raspoređivanje sredstava vrši se prema finansijskom planu, a konačna raspodjela je određena u skladu sa godišnjim obračunom. Sva prikupljena sredstva koriste se isključivo za ostvarivanje ciljeva Udruženja.

Član 37.

O raspolaganju sredstvima Udruženja odlučuje Upravni odbor, a za zakonitost korištenja sredstava odgovara lice koje će odrediti Upravni odbor na prijedlog finansijsko materijalne komisije.

XI - NAČIN DONOŠENJA FINANSIJSKOG IZVJEŠTAJA I IZVJEŠTAJA O RADU UDRUŽENJA

Član 38.

Krajem godine Upravni odbor Udruženja priprema prijedlog finansijskog izvještaja i izvještaja o radu Udruženja i dostavljaju skupštini Udruženja na usvajanje.

Skupština prijedlog finansijskog izvještaja i izvještaja o radu Udruženja usvaja dvotrećinskom većinom prisutnih delegata na skupštini Udruženja.

Ukoliko skupština Udruženja ne usvoji prijedlog finansijskog izvještaja i izvještaja o radu Udruženja vraća isti na doradu Upravnom odboru Udruženja, koji je dužan dorađeni izvještaj dostaviti skupštini Udruženja u roku od 30 dana.

XII - JAVNOST RADA UDRUŽENJA

Član 39.

Rad Udruženja je javan.

Javnost rada Udruženja se ostvaruje transparentnim istupima u javnosti.

Za davanje informacija o radu Udruženja ovlašten je predsjednik Upravnog odbora ili osoba koju on ovlasti.

XIII - ZASTUPANJE I PREDSTAVLJANJE UDRUŽENJA

Član 40.

Udruženje u pravnom prometu pred fizičkim i pravnim licima predstavlja i zastupa predsjednik Upravnog odbora, potpredsjednik Upravnog odbora i sekretar Udruženja.

Predsjednika Upravnog odbora, potpredsjednika Upravnog odbora i sekretara Udruženja imenuje Skupština Udruženja na mandatni period od četiri godine sa pravom reizbora.

XIV - POSTUPAK ZA DONOŠENJE STATUTA, IZMJENE I DOPUNE STATUTA I DRUGIH OPĆIH AKATA

Član 41.

Prijedlog Statuta utvrđuje Upravni odbor Udruženja i podnosi Skupštini na razmatranje i usvajanje.

Prijedlog za izmjene i dopune statuta može podnijeti 1/2 članova Udruženja.

Prijedlog se podnosi predsjedniku Udruženja.

Upravni odbor Udruženja priprema izmjene i dopune statuta u skladu sa Zakonom o udruženjima i fondacijama i iste dostavlja Skupštini Udruženja na razmatranje i usvajanje.

Član 42.

Statut donosi Skupština Udruženja sa 2/3 (dvije trećine) glasova svih prisutnih delegata na sjednici Skupštine Udruženja.

Izmjene i dopune statuta Udruženja vrše se na način i po postupku predviđenom za njegovo donošenje.

XV - UVJETI I POSTUPAK ZA PRESTANAK RADA UDRUŽENJA

Član 43.

Udruženje prestaje sa radom u skladu sa odredbama Zakona o udruženjima i fondacijama ili kad skupština Udruženja sa 3/4 (tri četvrtine) prisutnih delegata na skupštini Udruženja donese odluku o prestanku rada Udruženja.

XVI - PRAVILA ZA RASPODJELU PREOSTALOM IMOVINOM U SLUČAJU PRESTANKA RADA UDRUŽENJA

Član 44.

U slučaju prestanka rada Udruženja, nakon podmirivanja zakonskih obaveza Udruženja, preostala imovina Udruženja dodjeljuje se u vlasništvo donatorima ili uz njihovu saglasnost dodjeljuje se u vlasništvo srodnih Udruženja, koja će nastaviti djelatnost.

Odluku o raspodjeli preostale imovine u slučaju prestanka rada Udruženja donosi skupština Udruženja sa 2/3 (dvije trećine) prisutnih delegata na skupštini Udruženja.

XI - PRELAZNE I ZAVRŠNE ODREDBE

Član 45.

Tumačenje ovog statuta daje skupština Udruženja.

Član 46.

Ovaj statut stupa na snagu danom usvajanja na sjednici skupštine Udruženja, a primjenjivat će se od dana upisa u Registar udruženja kod nadležnog Ministarstva pravde i uprave Kantona Sarajevo. Stupanjem na snagu ovoga Statuta van snage se stavlja Statut Udruženja od 31.03. 2017. godine.

Sarajevo, 10. 08. 2017. godine

Predsjednik Skupštine
Sead Kulović